

十五『國家重點圖書出版規劃項目』

王 編 張繼禹

本冊主編 李遠國

華夏出版社

中華道藏

第四〇冊

目 録

001 靈寶領教濟度金書(中) 一

靈寶領教濟度金書卷之一

百三十四

洞微高士開光救苦真人甯全真授
靈寶通玄弘教水南先生林靈真編

科儀立成品

師友命過齋用

晚朝行道誦經儀

燒香頌

各禮師存念如法

衛靈呪

五星高耀，瑞炁飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪伐惡，道炁同流。神光照夜，陰翳俱收。萬仙降格，扇景乘飈。群生咸遂，惠遍神州。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲宣意。以今晚朝，升壇行道，燒香誦經，願得玉清道炁靈寶妙光下降，流入臣等身中，令臣所啓所奏，速達逕御太上無極大道至真玉皇上帝御前。

謹稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上官靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道真仙，三界官屬一切真靈。臣聞三洞開光，耀玄雲於三極。九華散景，流紫炁於九垓。清虛騰鸞翠之芳，碧落燦黍珠之象。巍巍大梵，落落高張，是爲玄妙之

文，實乃希夷之典。臣等粉榆末學，蓬華微生，雨露承恩，敢昭宣於帝載。雷霆煥令，願曲賜於皇靈。今有詞文，謹當宣奏。

宣詞

按如詞旨，極切矜哀。故三洞弟子某，精進求真，辛勤學道。建齋醮而攘魔癘，未究奇勳。飛章表而策罡圖，莫圓妙義。虛老時光之荏苒，每隨世路之崎嶇。幽夜倏罹，乘晨難返。臣等痛師往矣，以父事之。同學則云：道無異學，派本同源。痛切肺肝，合舉悼亡之典。哀縈心膂，願修追遠之儀。爰潔塵居，聿崇楓陛。八鸞暢轂，降紫極之真尊。九鳳翼轅，輅清微之元聖。借盈尺地，露方寸天。願垂遷拔之仁，爲溥提携之造。俾故三洞弟子某，登名南上，削過北都。普萬國以均沾，合三靈而共被。以今落景晚朝，升壇行道誦經，運茲初捻上香。願此香煙騰空逕上，供養無上至真道寶。臣等皈身皈神皈命，首體投地，願以是功德，上祝皇帝陛下。伏願車書萬里，夷夏一宗。天錫

聰明，坐朝章而底治。神資聖武，提野俗以登真。茅社誅誅，椒庭侃侃。今故燒香，自皈依師尊大聖衆。至真之德，得道之後，保天長存。和：與道合真。

以今晚朝升壇，誦經行道，運茲二捻上香。願此香煙騰空逕上，供養無上至真經寶。臣等皈身皈神皈命，首體投地，願以是捻香功德，歸流師尹典牧，蒞政臨民。伏願魚貫佐時，蟬聯體國。黃旗紫蓋，證六合以修文。朱紱金章，肅萬邦而偃武。里無妖蜮，野絕遺蝗。今故燒香，自皈依師尊大聖衆。至真之德，得道之後，升入無形。和：與道合真。

以今晚朝升壇，誦經行道，運茲三捻上香。願此香煙騰空逕上，供養無上至真師寶。臣等皈身皈神皈命，首體投地，願以是功德，歸流四方九野，萬姓兆民。伏願仁照覆盆，化成繁壤。雲聯隴畝，野無鴻鴈之憂。月滿郊源，里有鷄豚之樂。金穰應運，玉燭宣和。今故燒香，自皈依師尊大聖衆。至真

之德，得道之後，長享自然。和：與道合真。

舉七真讚第一首，歸位。

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過，所犯上方無極世界一切玄曹，悉祈赦宥。仍乞開度上方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，轉誦《太上洞玄靈寶無量度人上品妙經》，人各一過。專爲故三洞弟子某，消除所犯上方多劫罪咎，普及上方幽爽靈識，咸希清靜，獲遂周圓。伏願帝闕垂慈，天關流惠。羅敷鳳篆，敕宿過以雲收。浩

蕩龍恩，收寸勳而雷動。式宴空都之境，面朝明皇之尊。爲如上緣，請聖作證。念

大步虛第九首詣上方

禮方 方懺 啓神王

某上啓上方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣上方飛天使者，下降玄壇，承領符命，下告所司，開度故三洞弟子某，溥及上方幽爽靈識，上登仙都。所有真符，謹當告下。

告符 宣闕

焚簡頌

七真讚第七首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過所犯，下方無極世界一切玄曹，悉祈赦宥。仍乞開度下方

無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，轉誦《太上洞玄靈寶無量度人上品妙經》，人各一過。專爲故三洞弟子某，消除所犯下方多劫罪咎，普及下方幽爽靈識，咸希清靜，獲遂周圓。伏願梵炁垂慈，靈光流惠，寬三尺法過，已削於北酆。收八百勳功，頓超於南上。式宴水運之境，面朝洞神之尊。爲如上緣，請聖作證。念

大步虛第十首詣下方

禮方

十方總懺儀

臣等今故燒香，皈身皈神皈命，十方無極太上靈寶天尊，焚炁天君，十鄉神仙諸靈官。懺悔亡故某人，爰從無始，逮至今生，三業不除，六情自恣，五官搶擾，八識昏迷，輕慢科條，浮好道德，是

非顛倒，善惡紛紜，五臘三元，多違禁戒，四時八節，易缺朝修，仙品未充，帝恩莫際。致使運應減度，身經太陰，莫測升沉，善爲懺悔。以今修齋設醮，行香誦經，首過雪愆，祈恩請福，無量之罪，並乞赦原。亡故某了悟玄機，圓明自性，復還治職，炁入玄玄，高步天衢，永無輪轉，得道之後，升入無形。和：與道合真。

啓神王

某上啓下方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣十方飛天使者，下降玄壇，承領符命，下告所司，開度故三洞弟子某，溥及下方幽爽靈識，上登仙都。所有真符，謹當告下。

告符 宣關

焚簡頌

七真讚第八首 詣三寶前

臣與臨壇官衆等，鑪炷寶香，重伸供養，虛無自然元始天尊，無極大道太上道君，太上老君，高上玉皇，十方已得道

大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上官靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道真仙，三界官屬一切真靈。臣聞二章演奧，超苦海之慈航。三篇敷玄，實昏衢之慧燭。隱韻空歌於萬聖，靈音嘯朗於諸天。靈寶囿建大法橋，無文不度。玄元道出群迷徑，有惑斯通。故功德以難勝，有禎祥之可翼，巍巍莫極，蕩蕩難名。凡攄真切之忱，宣賴提携之造。臣向來奉爲故三洞弟子某，崇建師友命過行香誦經道場，看誦《太上洞玄靈寶無量度人上品妙經》。莫不澄心淪性，滌慮清神。啓紫陽玉匱之條，攝齋嘯咏。遵丹禁金函之律，縮枉謳誦。經聲朗振於十天，願力容周於三界。人各十過，彰十轉回靈之功。經演一乘，表一致同歸之效。以茲功德，奉爲故

三洞弟子某，削落夙過，洗滌前愆。南丹紀學道之勳，更生受化。北鬱刊返真之垢，起死升仙。永無輪轉之憂，常享太平之運，福覃後嗣，慶及宗枝。稽首皈依無極大道。

三聞經

重稱法位

具位臣某恭焚寶香，重誠奏啓虛無自然元始天尊，玉宸大道靈寶天尊，混元皇帝道德天尊，十方無極太上靈寶天尊，三寶丈人，三寶帝君，五方五老上帝，三十二天上帝，木公尊神，金母元君，上聖高尊，諸天真衆，太陽、太陰、五星道君，主筭、紀名、落死、上生、大魁五斗星君，護魂、侍魄、養炁、通血、中主五帝真君，諸天丞相，南昌上宮韓司主錄監生大神，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神，回骸起死無量度人君，玄中大法師，三天大法師，天真皇人，妙行真人，玄一三真人，太極太虛真人，太極左宮仙翁沖應真君，三界五帝大魔王，十方無極飛

天神王，長生大聖，無量度人君，飛天真人，飛天使者，飛龍騎吏，玄都紫微上宮侍經玉郎，玉童玉女，神仙靈官，靈寶經籍度三師真君，名山洞府領教真仙，三十二天玉童玉女，功曹使者，直符香官，領仙監齋諸君吏，靈寶玄壇香官使者，左右龍虎君，三界直符使者，四直玉文功曹，玄壇內外一切威靈。臣等夙慶攸鍾，昌期欣際。駒陰暗老，徒窺肘後之丹章。鮒轍自慚，莫淪眼中之紅瑱。虛負承宣之寄，未全化育之功。天宇春融，幸逃瘴曠。城位秋凜，莫遂升遷。期五體以對揚，庶百身而負荷。故三洞弟子某，蒙恩罔極，惟師是依。同學：派宗之異，唯喏真常。慮名掛於九霄，而跡迷於五濁。三惑飄蕩其志氣，內喪天和。七情顛頓其精神，外令人僞。誠莫殫於奏對，志惟慢於設施。將吏弗臨，神靈靡佑。致功賒於五帝，而過犯於三官。難追天威，曷逃鬼責。自非籲天而請命，何由悔過以祈恩。肆演沖科，齊聿嚴於懺謝。爰經同志，經庸演於勤修。伏願

上帝哀憐，元皇矜憫，察其修真學道志，非惡死以貪生。憐其勞心苦神，性惟濟生而度死。赦除積過，紀錄微功。爲紀字於東華，即受書於南上。永辭塵世，得爲種民。蒙監映於丹忱，允昭宣於洪貺。上願二極平寧，三辰朗晏，陰陽順序，風雨均調，瑞露凝甘，卿雲耀彩。鳥獸魚鼈而咸若，動植滋生。山川鬼神以攸寧，顯微安泰。寒庭息苦，夜壑停酸。則上明天尊大慈之化，下副臣等皈命之誠。謹啓以聞。

發願

復鑪

出堂頌

回靜默

謝師尊

舉回向

靈寶領教濟度金書卷之一百三十四

靈寶領教濟度金書卷之一

百三十五

洞微高士開光救苦真人甯全真授
靈寶通玄弘教水南先生林靈真編

科儀立成品

師友命過齋用

設真靈醮儀

燒香頌

各禮師存念如法

衛靈

鳴法鼓二十四通

發鑪

謹稱法位

具位臣某，謹重誠上啓。臣以宿慶欣逢，
玄樞快睹，憲天宏道，宣德承符，超度
先亡，和安見在，職守攸繫，匪敢怠荒。
凡有皈投，理宜關告。今有故三洞弟
子某，半生學道，勵志耽玄，仙品未充，
運應滅度。臣等恩隆師友，盍罄哀誠，
爰潔壇場，庸伸薦拔。三朝行道，十徧

轉經，曲荷天恩，俯從人欲，齋懺備舉，
經法周圓。故三洞弟子某，獲離黑都，
登名朱府，靖惟所自，實拜陶鎔，環草
情鍾，若爲報稱，敢陳淪祭，肅輅飈遊。
伏願羽蓋瓊輪，翩翻蒞止，丹輿綠輦，
絡繹齊臨，三界職司，十華仙聖，翼輶
騶乘，恪副翹傾。臣下情無任祈恩，伺
命之至，謹稽首再拜奏請。

謹奉降

太上無極大道虛無自然元始天尊，太
上大道君，太上老君，十方靈寶天尊，
三寶丈人，三寶天君，伏乞應感分輝，
降臨醮座。

謹奉降

昊天玉皇上帝，紫微大帝，天皇大帝，
五方五老上帝，三十二天上帝，四梵天
君，木公金母，諸天衆聖，天真大神，上
聖高尊。伏乞應感分輝，降臨醮座。

謹奉降

太陽太陰，五星道君，五斗星君，二十
八宿星君，南斗六司真君，北斗七元真
君，璇璣玉衡周天星象。伏乞應感分
輝，降臨醮座。

謹奉降

諸天丞相，南昌上官韓司主錄監生大
神，度人不死尊神，南極長生大君，度
世司馬大神，好生韓君丈人，南上司命
司錄延壽益算度厄尊神，迴骸起死無
量度人君。伏乞應感分輝，降臨醮座。

謹奉降

青帝護魂君，白帝侍魄君，赤帝養炁
君，黑帝通血君，黃帝中主君，五天五
帝大魔王，三界大魔王，十方無極飛天
神王，長生大聖，無量度人君，飛天神
人，飛天使者，飛天騎吏。伏乞應感分
輝，降臨醮座。

謹奉降

三十六部尊經、玄都紫微上官侍經玉
郎，玉童玉女，典禁靈妃，神仙騎吏，三
洞威神，三寶官屬。伏乞應感分輝，降
臨醮座。

謹奉降

玄中大法師，三天大法師，天真皇人，
妙行真人，玄一三真人，太虛真人，太
極左宮仙翁沖應真君，名山洞府領教
真仙，得道聖衆，本靖祖玄真、經籍度

三師真人。伏乞應感分輝，降臨醮座。

謹奉降

靈寶三十二天玉童玉女，功曹使者，直符香官，五方五靈，玉童玉女，諸天飛龍騎吏，三洞天地神真，日月星宿，江河湖海、嶽瀆九宮五帝兵馬乘騎。伏乞應感分輝，降臨醮座。

謹奉降

靈寶領仙監齋諸君吏，六部治職仙官，赫奕仙曹，施用仙曹，三界所向仙曹，仙靈官吏。伏乞應感分輝，降臨醮座。

謹奉降

靈寶玄壇香官使者，左右龍虎君，四直玉文功曹，三界直符使者，直壇土地，虛空監察，應感真靈。伏乞應感分輝，降臨醮席。

初獻

臣謹重誠上啓。臣以天貺下臨，洞輔降世，鸞圖鳳牒，昭布寰瀛，度死濟生，玄恩罔極，幸承覆載，獲睹真宗。佩奉修持，禮天無斂，期敷帝澤，庸福存亡，上暢宸恩，下提民瘼。故三洞弟子某，幸依道化，一志奉行，設醮建齋，驅魔遣

癘，上章拜表，誦經朝元，律按威儀，寧無違戾，格存俯仰，易致謬差，誠錯是非，敬乖向背，揆諸條令，難免譴訶，度世延生，未臻好術，形神分散，遽謝世緣。臣等永言孝思，不堪哀慕，恐墮幽沉，莫測升沉。輒按典儀，修崇齋事，更遵寶式，行香誦經。曲荷慈悲，溥垂景佑，懺罪罪滅，祈福福生。無量劫來，過咎深淺，悉蒙原赦，清淨身心。超離苦途，普登善地，回骸起死，受化更生，南昌受書，東華定策，紀錄功績，永爲種民。萬歲千秋，逍遙仙路，鴻恩曷報，蟻悃勤拳，敢奉蘋蘩，庸伸芹敬。伏冀高真日監，萬聖時歆，采菲采葑，將垂慈鑒。臣不勝虔祝之至，稽首再拜。

亞獻

臣謹重誠上啓。臣以視聽自民，鑒觀有翼，灾祥在德，應感無遺。故三洞弟子某，既拜恩綸，獲逃言責，今生學道，期立微功。伏願曲赦頒春，龍禧普被，賜令枯朽，即獲逍遙。申錫三官，告命五帝，疾除罪簿，落滅惡根。保舉上仙，

遊行三界，膺符受職，度上南宮。千齡一朝，永無輪轉，皆如經旨，不負訓嚴。臣幸忝修真，擎拳至道，希夷離俗，寧無顧懷。所冀元始，垂慈虛皇，曲憫潛爲，覆蔭慰此。至心庶得，學道遂成，頓超世網。乘晨跡景，早證明師。丹華書名，青編紀善。即圓勳行，疾悟真常。頓超無爲，永辭有漏。蒙如丹悃，允拜玄恩。上願科教興行，經法流演，洞輔通暢，道德宣明，覆載清寧，儀璘煥耀，風雲藏靜，雨露滋榮，草木蕃鮮，山川秀潤，蟲魚樂育，鳥獸孳生，盜賊消除，人民安泰，田多嘉穀，野絕遊農，六道停輪，三途罷對，普天率土，陽域陰郊，均拜恩榮，悉皆慶溢。臣不勝虔祝之至。

終獻

宣都疏

臣謹重誠上啓。臣以大禮必簡，至敬無文，饗帝貴嚴，事天以實，三周莫獻，至罄忱恂，一念敷陳，備殫衷素。以今聲沉玉籟，香冷金彝，斗轉參橫，漏殘夜永，法事粗悉，鸞駕將旋，仰望霓旌，已

飛天表。臣等莫攀法從，惟劇神馳，升卓之恩，乞垂玄祐。臣不勝瞻依激切，屏營之至，謹稽首再拜奉送。

回輶頌

復鑪

靈寶領教濟度金書卷之一百三十五

靈寶領教濟度金書卷之一百三十六

洞微高士開光救苦真人甯全真授
靈寶通玄弘教水南先生林靈真編

科儀立成品

祈禳通用

分燈儀

法師詣三寶前

具位臣某誠惶誠恐，稽首頓首，再拜奏
啓太上無極大道玉清聖境元始天尊，
上清真境靈寶天尊，太清仙境道德天
尊。恭望道慈，俯垂省錄。臣聞陰陽剖
判，陽光高映於玄虛。晝夜循環，夜色
低迷於寥廓。況居濁世，動涉昏衢。
非陶三景之靈芒，曷破十華之幽暗。
是以帝師曲憫，仙聖弘慈。散燄流光，
藹琅音於回耀。垂華示象，揚玉籙於
明燈。金籙著消灾懺罪之儀，瓊房隱
內觀求仙之旨。中華五臟，外燭百形。
上晃朗於層霄，下陸離於寰域。法陰

開夜，續書還陽，巍巍妙用以難明，赫
赫神功而普被。今齋主某，崇建某齋，
遵依科範，建立玄場。敷蓮炬於十門，
列蘭膏於四界。紫宸請命，希垂無極
之神輝。丹闕疏恩，冀削有生之陰障。
伏願玉毫遠照，金相流華，仗三氣之真
符，按九光之聖彩。煌煌散景，太空之
星斗交羅。燦燦凝煙，遙漢之虹霓隱
映。亘天徹地，遣暗生明，迎陽福以召
禎祥，驅陰符而度厄難。由茲慧燭，遍
照迷途。躡空洞以仙飛，形神俱妙。
感虛無而朗徹，性命合真，加持燈光，
稱揚寶號。

大聖道寶天尊

大聖經寶天尊

大聖師寶天尊

法師秉燈在手，宣明燈呪

元始開圖，九陽吐精。虛無一炁，光耀
天經。流明太空，日月華燈。羽章披
朗，蕩蕩玉清。金華映霄，玉芝自生。
降光照夜，朱陽煥升。玄精隱伏，華象
開明。神燈洞景，離羅長庚。削滅九
陰，輝光散英。上徹福堂，下燭幽局。

中明室宅，罪滅福興。八景齊到，萬願咸并。魂魄自然，通真達靈。却除死籍，注上生名。消灾除厄，邪怪潜形。度身仙籍，七祖飛騰。神明侍衛，流慶家庭。華燈一照，身宅光明。和：與道合真。

祖炁凝華，運二儀而成象。靈光轉燭，亘八極以流精。飛芒煥爛於銀缸，舒燄熒煌於玉樹。廓清陰暗，開朗晨輝，承鬱儀陽燧之華，接元始圓光之象。散一爲萬，燈燈相續以無窮。自表及中，景景俱明而莫盡。妙哉利益，至矣莊嚴。今將依按玄科，輝明丹炬，仰祈霄造，俯軫愚衷。稽首皈依，分燈如法。

法師以紙撚點燈在手宣明燈呪
大道凝輝，丹霞散陳。炎精童子，洞煥朱煙。照映室宅，削滅妖氛。今日大慶，萬象晶熒。群陰潛伏，幽暗開明。靈光所被，夜景澄新。神燈華燦，朗徹三辰。煌煌滿卮，灼爍重昏。開陽消陰，沉翳和溫。普映內外，丹精上聞。金童侍香，素女通靈。扶衰度厄，正魄

安魂。落落開張，上照諸天。梵炁彌羅，下達黃泉。灾凶辟斥，斷塞邪源。祖玄欣慶，希陽乘晨。我身光明，洞達無邊。功沾一切，生死蒙恩。和：與道合真。

點燈

道生一，一生二，二生三，三生萬物。見前清衆，請爲分輝。

流光法界天尊

太上散十方，華燈通精誠。諸天皆赫然，諸地悉朗朗。我身亦光徹，五臟生華榮。炎景朝太虛，遐想通玉京。

旋繞 立班

向來然燈，功德悉已周圓。伏願齋主某，心燈熒微，性燭澄明。九厄三灾，遂燼花而削落。千祥萬福，隨燄蕊以舒長。松柏貞堅，芝蘭秀發，樂壺天之不夜，融福地以長春。民欲有孚，帝恩無外，俯窮九壘，旁徹十華，均離幽暗之鄉，永化光明之界。稽首皈依無極大道，志心稱念燈光普照天尊。和：不可思議功德。

北斗燈儀

碧虛縹緲，騰寶霧於金猊。紫漢氤氳，藹飛煙於玉鳳。一誠露奏，萬福天開。以今恭薦寶香，遙瞻供養太上無極大道三清上聖，三寶至尊，紫微中天北極大帝，勾陳上官天皇帝，中天高上玉皇尊帝，太微玉帝，北極玄卿大帝，貪狼玉皇九晨君，巨門玉皇北上晨君，祿存玉皇主仙華晨君，文曲玉皇玄上飛蓋晨君，廉貞玉皇金魁七晨君，武曲玉皇北辰飛華晨君，破軍玉皇總靈九元北蓋晨君，外輔玉皇帝尊九晨君，內弼玉皇帝真元晨君，九晨夫人，九陰內妃，三台華蓋星君，斗中玄曹，道德聖衆。齋主某建生本命，元辰星君，運限照臨，一切星宰，虛空監察，應感真靈，太歲尊神，日直真官，土地正神，里域主宰，仗此寶香，普同供養。伏聞圓方剖粹，九晨端御於玄樞。經緯凝精，七政高羅於紫極。運帝車而四方臨制，鼓化瑟而萬範恢張。中垣領喉舌之司，東藩儼權衡之任。朝三五於地紀，明十二於天罡。召運僊輪，九五應陰

陽之度。枕參携角，四七定冬夏之期。履魂魄以飛翔，妙空常而變化。裁成五炁，調理群靈，金池開龍漢之祥，玉局啓鶴鳴之運。靈光燁燁，拱帝座於勾陳。聖化巍巍，蔭民生於輿幅。法橋穩駕，真路宏開，惟殫積善之丹忱，斯契降祥之玄監。以今齋主某，福基夙挺，道運欣逢，輒邀環珮之班，庸對璇璣之御。霞披藥笈，遡玉漢以瞻星。風潔蓬居，列銀缸而建斗。飛晨合景，耀彩凝芒，紫煙聯三素之輝，丹餞吐九華之瑞。伏願青華定錄，壺天宴樂於春臺。丹簡上生，福地迴旋於壽域。吉祥止止，福慶熙熙，稽首皈依無極大道。

臣衆等志心皈命，中天大聖北斗貪狼陽明玉皇君，斗中神仙。和：諸靈官。

伏以靈華天上，玄魁注青炁之精。太上宮中，太尉御玉樓之邃。執玄圖以司萬化，列琪樹而開九門。司政糾非，錄功察過。總九天之真聖，參贊紫樞。監五嶽之飛仙，昭明玄格。下提後學，中領神靈，分野應秦徐之鄉，建生推子

極之位。是爲日配，所主天元，占身象於星燈，表英名於遁甲。今有齋主某，馳神璇闕，藏事瑤壇，皈命中天大聖貪狼陽明玉皇君。伏願玉籙書名，青精定命，箕疇九五，福並東海。以天開莊筭八千秋，齋南山而地久。慧源波瑩，神觀風清，溢和氣於家庭。襲靈光於動履。宸恩久被，民欲有孚。稽首皈依，虔誠讚詠。

信禮高上紫微垣北斗貪狼星君。

北斗延生，回真四靈。流輝下映，朗達玄冥。七元命籍，名列紫瓊。保身續壽，永亨利貞。耳目開爽，魂魄長寧。攝養精炁，與神同明。延生自然，上升玉清。和：願得長生。

臣等志心皈命，中天大聖北斗巨門陰精玉皇君，斗中神仙。和：諸靈官。

伏以神華天上，玄斗注黑氣之精。中元宮中，上宰御玉樓之邃。執羽節以參萬化，列瓊樹以開五門。宿命攸司，祿存是職。總普天之列宿，經緯運行。領率土之萬靈，陰陽燮理。下監兆姓。中理真仙，分野應楚益之鄉，建生推丑

亥之位。是爲月配，所主地元，占命象於星燈，表任名於遁甲。今有齋主某，馳神璇闕，藏事瑤壇，皈命中天大聖北斗巨門陰精玉皇君。伏願朱臺書名，玄芝定命，根塵煙滅，靈光開曉鑑之輝。業障雲消，定水映秋蟾之影。北真落死，南極上生，垂奕葉之芳猷，慶連枝之樂事。天休滋至，民願允諧。稽首皈依，虔誠讚詠。

信禮高上紫微垣北斗巨門星君。

北斗度厄，高仙上靈。流輝遍照，內外肅清。七元紀籍，名列紫庭。扶身延壽，祿位長亨。臟腑開朗，動止咸寧。光運合景，與神同榮。度厄自然，上升玉京。和：願得長生。

臣衆等志心皈命，中天大聖北斗祿存玉皇君，斗中神仙。和：諸靈官。

伏聞玄皇天內，上精注黃炁之芒。真元宮中，司空御玉樓之邃。執青籙以敦帝化，列琳樹以開華門。位領仙曹，職司神籍，總九聖之真宰班，秩森羅監五嶽之神靈。過功昭朗，下提學道，中領仙真，分野應梁冀之鄉，建生推寅戌

之位。是爲火配，所主日元。占福象於星燈，表柱名於遁甲。今有某馳神璇闕，歲事瑤壇，皈命中天大聖祿存真人玉皇君。伏願方諸書名，黃絹定命。一千二百戒行，炁宇高華。八萬四千塵勞，神光照耀。朱顏不老，紫氣長新，芝蘭衍文獻之傳，桑梓茂弦誦之俗。民情溥遂，帝渥旁敷，稽首皈依，虔誠讚詠。

信禮高上紫微垣北斗祿存星君。

北斗保命，玄靈散陳。丹田通暢，運合仙真。七元定籍，名列紫文。護身注壽，祿慶維新。辟除邪惡，善瑞日臻。去來無礙，與神同倫。保命自然，上升玉寶。和：願得長生。

臣衆等志心皈命中天大聖北斗文曲玄冥玉皇君，斗中神仙。和：諸靈官。伏聞皇華天上，綱極注紫炁之精。紐幽宮中，遊擊御玉樓之邃。執命靈而裁萬化，列琅樹而開三門。伐逆攸司，悖凶是職。總九天之神鬼，清肅虛玄。監萬地之死生，提携品類。下衡地府，中領北宮，分野應荆吳之鄉，建生推卯

酉之位。是爲木配，所主月元。占祿象於星燈，表心名於遁甲。今有齋主某，馳神璇闕，歲事瑤壇，皈命中天大聖文曲玄冥玉皇君。伏願玉格書名，丹芝定命。三靈備體，並洪福於滄溟。五炁朝元，等龜齡於箕翼。川增百順，雲散千灾，漱玉醴以酣和，固瓊顏而味道。宸光密映，民欲協從。稽首皈依，虔誠讚詠。

信禮高上紫微垣北斗文曲星君。

北斗益筭，明霞散敷。流光普市，真炁長扶。七元度籍，名列紫書。治身添壽，常慶歡娛。飛仙蹈舞，遊宴玄都。徹視表裏，與神同居。益筭自然，上升玉虛。和：願得長生。

臣衆等志心皈命中天大聖北斗廉貞丹元玉皇君，斗中神仙。和：諸靈官。伏聞元皇天上，靈關注白炁之精。綱神宮中，斗君仰玉樓之邃。執青籙以成萬化，列丹樹以開七門。命籍攸司，混輿是統。總空霄之譜錄，主宰圓方。領鬼神之簿書，權衡善惡。下提地底，中領仙真，分野應趙充之鄉，建生推辰

申之位。是爲土配，所主江元。占官象於星燈，表禽名於遁甲。今有齋主某，馳神璇闕，歲事瑤壇，皈命中天大聖廉貞丹元玉皇君。伏願崑臺書名，金精定命。亭亭壽址，摩翠岱於青冥。浩浩福源，瀉銀潢於碧漢。階蘭茂秀，庭桂光華，景雲開步武之祥，彩霧藹家門之瑞。民生咸慶，帝化均沾。稽首皈依，虔誠讚詠。

信禮高上紫微垣北斗廉貞星君。

北斗消灾，玄黃開陽。仙靈影現，光徹十方。七元掌籍，名列紫房。衛身益壽，長啓福祥。明真降佑，滌蕩凶殃。華精炁結，與神同鄉。消灾自然，上升玉堂。和：願得長生。

臣衆等志心皈命中天大聖北斗武曲北極玉皇君，斗中神仙。和：諸靈官。伏聞中皇天上，紫極注綠炁之精。紀明宮中，太常御玉樓之邃。執玉策以明萬化，列玄樹以開八門。升進功勤，轉輪階級。總九天之真聖，遷賞躋班。統五嶽以飛仙，錄勳加秩。下司得道，普領學人，分野應燕揚之鄉，建生推己

未之位。是爲水配，所主河元。占壽象於星燈，表輔名於通甲。今有齋主某，馳神璇闕，歲事瑤壇，皈命中天大聖武曲北極玉皇君。伏願金臺書名，水瑛定命。珠星輝潤，襲佳炁而門庭相歡。璧月涵清，湛靈臺而精神永固。流芳燕翼，化戴鴻鈞，無三灾九厄之憂，感萬聖千真之護。天祥允集。民欲潛孚。稽首皈依，虔誠讚詠，

信禮高上紫微垣北斗武曲星君。

北斗扶衰，真宗降靈。流霞散光，仙伏交盈。七元典籍，名列紫營。固身養壽，慶合連并。高玄接引，優游五明。駕景飛翔，與神同齡。扶衰自然，上升玉庭。和：願得長生。

臣衆等志心皈命中天大聖北斗破軍天關玉皇君，斗中神仙。和：諸靈官。

伏聞真皇天上，運天注絳炁之光。闕會宮中，上帝御玉樓之邃。執神章以敷萬化，列華樹而開一門。機運攸司，劫會是職。總四時長短之度，消息調和。領二儀否泰之期，盈虛統濟。機參造化，權幹陰陽，分野應齊豫之鄉，

建生推午支之位。是爲金配，所主海元。占妻象於星燈，表衡名於通甲。今有齋主某，馳神璇闕，歲事瑤壇，皈命中天大聖破軍天關玉皇君。伏願玉籙書名，芝膏定命，八景含兔鳥之影，福樹春融。千齡齊龜鶴之期，壽基日闢。蓬茅有耀，梨棗無塵。敦學詩學禮之風，極潤屋潤身之樂。民情上徹，帝渥下敷。稽首皈依，虔誠讚詠，

信禮高上紫微垣北斗破軍星君。

北斗散禍，玄英禦凶。靈威備守，妖邪絕蹤。七元注籍，名列紫彤。榮身增壽，享福無窮。仙官扶衛，步躡雲中。正真降集。與神同聰。散禍自然，上升玉宮。和：願得長生。

臣衆等志心皈命中天大聖北斗外輔洞元玉皇君，斗中神仙。和：諸靈官。

伏聞太常天上，空真注碧炁之芒。帝席宮中，尊帝御玉樓之邃。執火鈴以旋萬化，列青樹而開八門。真仙攸司，神靈是職。天地嶽瀆之廣，典領無違。罪福功過之繁，分別有要。總領樂事，考察元臣，占吉象於星辰，表內名於通

甲。今有齋主某，馳神璇闕，歲事瑤壇，皈命中天大聖外輔洞元玉皇君。伏願上清書名，芝瑛定命。歲功三百六十時，迎紫炁以龍恣。天高八萬四千里，耀華芒而鬱勃。金丹駐景，玉液延年，門庭消五濁之塵，步武被三靈之慶。玄恩誕布，丹悃潛通。稽首皈依，虔誠讚詠，

信禮高上紫微垣北斗外輔星君。

北斗洞明，神彩發輝。內暢真元，外集玄微。九光領籍，名列紫墀。消灾注福，邪害不欺。骨清氣爽，曉暢靈威。長生受慶，與臣同飛。遊行自然，上升玉虛。和：願得長生。

臣衆等志心皈命中天大聖北斗內弼隱元玉皇君，斗中神仙。和：諸靈官。

伏聞變靈天上，元寶注玄炁之芒。上尊宮中，太常御玉樓之邃。執帝章而參萬化，列華樹以開九門。變化無方，隱藏莫逆。九州萬國之衆，考察無私。三公九卿之尊，權衡有賴。裁成庶務，化育群工，占福象於星燈，表蓬名於通甲。今有齋主某，馳神璇闕，歲事瑤壇，

皈命中天大聖內弼隱元玉皇君。伏願九天書名，曜暉定命。光風霽月，融和氣於門闌。景星卿雲，擁祥光於步武。灾消未兆，福衍方來。湛定水以無塵，聳仁山而益秀。洪休密映，素悃潛孚。稽首皈依，虔誠讚詠。

信禮高上紫微垣北斗內弼星君。

北斗隱元，潛耀紫微。迴靈飛景，真炁含輝。九光典籍，名列紫芝。延齡注福，吉慶相隨。耳目清暢，身心協熙。掃蕩妖禍，與神同歸。徘徊自然，上升玉墀。和：願得長生。

福生無量天尊

衆誦大呪旋繞

大慈延壽天尊

向來關祝北斗星燈，功德周圍。伏以飛登道妙於函三，孰窺天寶。祈懺旨宣於正一，爰露神機。惟秉陽崇臨下之綱，故垂象總受中之柄。玉垣左燦，制天政於九晨。金闕前輝，溥帝恩於六合。權衡是賴，橐籥無私。今有齋主某，覺性命之根宗，企玄元之闡域。燈輝玉藥，章唱金玄。虹梁步接於紫

雲，鶴馭蹕移於璇極。允孚帝監，仰荷宸休。伏願降謐落之華芒，四魔滅跡。挹元皇之正炁，三景齊年。與道合真，爲善最樂。簪紱耀堆牀之笏，詩書華插架之籤。隴畝雲連，倉籍星燦。暢歡聲於庭戶，襲世慶於曾玄。萬善悉陶，千祥加被，祖宗超邁，眷屬安寧，普及含靈，俱登道岸。爲如上緣，請聖證明。志心稱念，福生無量天尊，長生保命天尊，延壽益筭天尊。和：不可思議功德。

靈寶領教濟度金書卷之一百三十六

靈寶領教濟度金書卷之一百三十七

洞微高士開光救苦真人甯全真授
靈寶通玄弘教水南先生林靈真編

科儀立成品

祈禳通用

南斗燈儀

步虛 灑淨 祝香

慶雲蒙藹，結玉字於玄虛。霏霧羅敷，騰金輝於碧落。丹誠應感，玄澤昭回。以今恭薦寶香，遙瞻供養太上無極大道三清上聖，三寶至尊，南極長生大帝，南極注生大帝，南極老人壽德星君，南斗天府寶光王玉玄上真道君，天相丹精玄明寶室上真道君，天梁靈瑤寶耀赤天上真道君，天同景明碧虛真王，天德上真道君，天柱極真太玄寶仙玉皇太上上真道君，天機紫宸絳房玄玄大帝玉真上真道君，南斗道德玄曹聖衆，火鈴將軍，六星童子。齋主某建

生本命，元辰星君，運限照臨，一切星宰，太歲尊神，日直香官，虛空監察，應感神祇，土地真靈，里域主宰，仗此寶香，普同供養。伏聞大微三光之庭，拱紫微而分政。南極二儀之籥，對北極以宣符。凝精耀天廟之芒，經度羅星紀之舍。位尊太宰，典樞機於三十六禽。權領都曹，職陰陽於七十二候。御火配九光之運，處離參七政之衡。萬象依光，百靈受命。朱綱玉緯，妙魂魄以飛登。翠蓋黃輿，總人神而掌握，賢明受爵，金華宣威，靈光赫赫以陶鎔，聖化巍巍而統制。欲徵善應，宜暢真宗。今有齋主某，稟炁塵籠，宅心道域，企紫霄而稽首，瞻丹闕以馳神。霞袂陸離，翻三乘之瓊範。雲光煒燁，象六曜之金輝。瑞煙騰綠藹之祥，芳燄襲絳華之炁，花開景運，燼落灾符。伏願丹臺書名，朱宮紀善。映秋霄之璧月，塵寂心空。浴定水之珠蓮，染離性朗。福並儀璘之大，壽齊灞霍之崇。稽首皈依無極大道。

臣衆等志心皈命南斗大聖天府司命

真皇君，斗中神仙。和：諸靈官。

伏以明德宮中，儼丹玉絳華之闕。司命府內，仰上相鎮國之尊。注紫炁以流芒，臨赤天而布政。中監萬國，上翼九霄。立極膺符，運祚權衡於鳳曆。提封御宇，域畿主宰於鴻圖。下領人民，旁司壽命，建生推子午之位，分野定金吳之鄉。是爲斗魁，用司天政。今有齋主某，齋心事帝，潔己瞻天，皈命南斗大聖司命真皇君。伏願玄澤下敷，丹表上御。景星耀彩，天開宇宙之符。銀漢流輝，人襲家庭之慶。金穰應運，玉燭宣和。無札瘥夭傷之虞，集富貴康寧之壽。群生穆穆，萬兆熙熙。稽首皈依，虔誠讚詠。

信禮高上太微垣南斗司命星君。

南斗司命，流光度人。上翊九天，下總群倫。六司定籍，名列丹天。玄綱所指，敷落靈真。家國安鎮，萬壽一人。魂炁清爽，與神同仁。鎮國自然，上升玉宸。和：願得長生。

臣衆等志心皈命南斗大聖天相司錄真皇君，斗中神仙。和：諸靈官。

伏聞洞宮天中，儼七寶藥金之闕。天

相府內，御司錄鎮嶽之尊。注丹炁以流芒，御赤天而佐理。寰中是統，域內攸司。五嶽四瀆之崇，靈威統制。三島十洲之邃，聖化攝提。中領神仙，下臨地庶，建生推丑未之位，分野定會稽之鄉。是爲斗魁，用司地政。今有齋主某，齋心事帝，潔己瞻天，皈命南斗大聖上相司錄真皇君。伏願洪貺下頒，素忱上達。九天錫慶，九圍昭仁壽之風。八景垂精，八極衍太和之治。山靈薦瑞，川后呈祥，御萬姓以薰陶，辟千殃而鼓舞。百室盈止，庶事康哉。稽首皈依，虔誠讚詠。

信禮高上太微垣南斗司錄星君。

南斗司錄，相火流光。華精固結，正炁當陽。六司注籍，名列丹房。五嶽安鎮，八紘阜康。辟除毒害，斷滅不祥。動用迪吉，與神同方。鎮嶽自然，上升玉堂。和：願得長生。

臣衆等志心皈命南斗大聖天梁延壽真星君，斗中神仙。和：諸靈官。伏聞含光宮中，儼七寶丹瑛之闕。天

梁府內，仰延壽保命之尊。注紫炁以流芒，坐赤天而贊化。主持性命，裁制年齡。金書開久視之基，上司萬乘。玉簡紀長生之筭，下領兆臣。推校霜明，銓量日赫，建生推寅申之位，分野定丹陽之鄉。是爲斗衡，用司春政。今有齋主某，齋心事帝，潔己瞻天，皈命南斗天梁延壽真皇君。伏願民情上通，天恩下映。朱陽定錄，並龜鶴以齊齡。丹天標名，等椿松而分福。青春宴樂，綠鬢光華，風波絕塵外之憂，日月永壺中之景。詩書世澤，文獻家聲。稽首皈依，虔誠讚詠。

信禮高上太微垣南斗延壽星君。

南斗延壽，天梁福星。飛晨合景，舍次通明。六司掌籍，名列丹經。保固形命，攝精養神。消災滅罪，注福延生。命齊日月，與神通靈。保命自然，上升玉清。和：願得長生。

臣衆等志心皈命南斗大聖天同益算真皇君，斗中神仙。和：諸靈官。

伏聞柔德宮中，儼玄天金明之闕。天同府內，御益算保生之尊。注青炁以

流芒，居赤天而御政。生成萬彙，化育群生。盡華夷海島之殊，悉歸統部。極動植飛潛之衆，普藉陶鎔。各保天年，克延命址，建生摧卯酉之位，分野定豫章之鄉。是爲斗衡，用司夏政。今有齋主某，齋心事帝，潔己瞻天，皈命南斗大聖天同益算真皇君。伏願精意上昭，靈光下濟。金華定命，冰消障累於門闌。玉醴流形，雲擁蕃釐於步武。生根益固，壽域宏開，雲仍敦詩禮之風，眷屬被絃歌之化，四時寧謐，萬事圓成。稽首皈依，虔誠讚詠。

信禮高上太微垣南斗益算星君。

南斗益算，位列天同。清光普照，生炁居中。六司注籍，名列丹穹。榮生添壽，福慶無窮。靈光微妙，無願不從。駕景迎祥，與神同宗。保命自然，上升玉宮。和：願得長生。

臣衆等志心皈命南斗大聖天樞度厄真皇君，斗中神仙。和：諸靈官。

伏聞寶光宮中，儼霞陽洞神之闕。天樞府內，仰度厄鍊魂之尊。注絳炁以流芒，端赤天而布化。職司籙籍，權領

樞衡。水沼華池，鍊形神而超凌三界。丹臺紫府，削灾厄而笑傲百齡。下典文章，兼提爵位，建生推辰戌之位，分野定廬陵之鄉。是爲斗杓，用司秋政。今有齋主某，齋心事帝，潔己瞻天，皈命南斗大聖天樞度厄真皇君。伏願宸渥下昭，精忱上徹。波澄月瑩，千灾無擾於靈臺。塵寂鑑明，五炁自朝於玄谷。形神俱妙，道德長新，靈光燦眷序之春，瑞炁闔門闌之旦。南陵錫福，北鬱消愆。稽首皈依，虔誠讚詠。

信禮高上太微垣高斗度厄星君。

南斗度厄，天樞尊靈。祥光燦爛，明徹金輪。六司紀籍，名列紫閣。迴骸起死，鍊魄陶魂。藏府冲悅，真炁長存。萬灾不干，與神同群。鍊度自然，上升玉門。和：願得長生。

臣衆等志心皈命南斗大聖天機上生真皇君，斗中神仙。和：諸靈官。

伏聞天節宮中，儼玄臺六華之闕。天機府內，仰上生大理之尊。注虹炁以流芒，臨赤天而贊政。紀綱是職，機要攸司。總天人生死罪福之編，權衡有